



REPUBLIKA E KOSOVËS / REPUBLIKA KOSOVA

CN.nr.100/2024

GJYKATA SUPREME E KOSOVËS, kolegji i përbërë nga gjyqtarët: Zenel Leku, kryetar, Muhamet Rexha dhe Nenad Lazic, anëtarë, në çështjen juridike përmbarimore të kreditorit C. F. E SA, me seli në G., - ., të cilin e përfaqëson sipas autorizimit Bajram Morina, avokat nga Gjakova dhe debitorëve N.T.P “L”., me seli në P., dhe Sh. D., nga P., rr. “...”, nr ., me objekt kontesti borxh, përkitazi me konfliktin e kompetencës, në seancën e kolegjit të mbajtur më 11.03.2024, merr këtë:

A K T V E N D I M

Për të gjykuar në këtë çështje juridike kompetente në pikëpamje lëndore është Gjykata Themelore në Prishtinë, Departamenti i Përgjithshëm, të cilës shkresat e lëndës i dërgohen në kompetencë të mëtejme.

A r s y e t i m i

Gjykata Themelore në Prishtinë, duke vepruar sipas propozimit të kreditorit C.F. E., SA, me seli në G., - Z., me aktvendimin E.nr.1093/2012 të datës 23.04.2013, ka lejuar përmbarimin ndaj debitorëve N.T.P “L”., me seli në P., dhe Sh. D., nga P., për ekzekutimin e borxhit në lartësi prej 50,378.00 €.

Ndaj këtij aktvendimi debitorët kanë paraqitë prapësim, ndërsa Gjykata Themelore në Prishtinë, me aktvendimin E.nr.1093/2012 të datës 12.09.2014 ka refuzuar të pabazuar prapësimin e

debitorit, të paraqitur ndaj aktvendimit mbi lejimin e përmbarimit E.nr.1093/2012 të datës 23.04.2013. Ndaj aktvendimit të lartcekur debitori ka paraqitë ankesë, ndërsa Gjykata e Apelit me aktvendimin Ac.nr.4323/14 të datës 26.01.2015 ka refuzuar si të pabazuar ankesën e përfaqësuesit të debitorit, ndërsa ka vërtetuar aktvendimin e Gjykatës Themelore në Prishtinë E.nr.1093/12 të datës 12.09.2014.

Gjykata Themelore në Prishtinë, Departamenti i Përgjithshëm, Divizioni Civil me aktvendimin E.nr.1093/12 të datës 01.02.2023, në pikën I të dispozitivit është shpallur jo kompetente në pikëpamje lëndore, për procedimin e kësaj çështje juridike, ndërsa në pikën II të dispozitivit është vendosur që pasi që ky aktvendim të bëhet i formës së prerë, lënda i dërgohet në kompetencë Gjykatës Komerciale në Prishtinë.

Gjykata Komerciale e Kosovës, Dhomat e shkallës së parë, Departamenti për Çështje Ekonomike me aktvendimin KPPP.nr.1848/23 të datës 13.02.2024, në pikën I të dispozitivit ka vendosur që të hapë konflikt kompetence në mes të Gjykatës Komerciale të Kosovës, Dhomat e Shkallës së Parë, Departamenti për Çështje Ekonomike dhe Gjykatës Themelore në Prishtinë, Departamenti i Përgjithshëm, për të vendosur në çështjen juridike përmbarimore në mes të kreditorit C.F E., SA, me seli në G., – Z., dhe debitorëve N.T.P “L”., me seli në P., dhe Sh. D., nga P., Në pikën II të dispozitivit është vendosur që për të vendosur lidhur më konfliktin e kompetencës lënda i dërgohet Gjykatës Supreme të Kosovës.

Gjykata Supreme e Kosovës, ka vlerësuar se në këtë rast kemi të bëjmë me konfliktin e kompetencës midis gjykatave të ndryshme të cilin e zgjidh Gjykata Supreme e Kosovës, bazuar në nenin 25.2 të LPK-së dhe nenin 13 pika 7 të Ligjit Nr.08/L-015 Për Gjykatën Komerciale.

Nga shkresat e lëndës rezulton se kreditori C.F.E., SA, me seli në G., – Z., më datë 07.06.2012 ka parashtruar propozim për përmbarim në ish Gjykatën Komunale në Prishtinë, tani Themelore në Prishtinë, me të cilin ka kërkuar që të detyrohet debitori N.T.P “L.”, me seli në P., dhe Sh..D., nga P., që t’ia paguajnë shumën prej 50,378.00 €. Gjykata ka lejuar propozimin për përmbarim të paraqitur nga kreditori, ndërsa me aktvendimin E.nr.1093/2012 të datës 12.09.2014 ka refuzuar si të pabazuar prapësimin e debitorit, e po ashtu Gjykata e Apelit ka refuzuar të pabazuar ankesën e debitorit dhe ka vërtetuar aktvendimin e lartcekur të shkallës së parë. Gjykata Themelore në Prishtinë, Departamenti i Përgjithshëm, Divizioni Civil, ka nxjerrë aktvendimin me aktvendimin

E.nr.1093/12 të datës 01.02.2023, me të cilin është shpallur jokompetente në pikëpamje lëndore dhe lëndën ia ka dërguar Gjykatës Komerciale të Kosovës për vendosje.

Gjykata Supreme e Kosovës vlerëson se në këtë çështje juridike me kompetencë lëndore për të gjykuar është Gjykata Themelore në Prishtinë, Departamenti i Përgjithshëm, për këto arsye:

Me nenin 1 të Ligjit për Procedurën Përmbare, përcaktohet se: *“Ky ligj rregullon procedurën përmes së cilës Gjykatat dhe përmbaruesit privat përcaktojnë dhe zbatojnë përmbarimin në bazë të dokumenteve përmbarues dhe dokumenteve të besueshme, përveç nëse me ligj të veçantë parashihet ndryshe.”* Me nenin 12 paragrafi 1 të Ligjit për Gjykatat nr.06/L-054, i shpallur në Gazetën Zyrtare nr. 22, datë 18 dhjetor 2018, parashihet që: *“Gjykatat themelore janë kompetente për të gjykuar në shkallë të parë të gjitha çështjet, përpos nëse me ligj parashihet ndryshe”*. Me nenin 13 paragrafi 1 të Ligjit për Gjykatën Komerciale, përcaktohet se: *“Gjykata Komerciale është kompetente për të gjykuar, dhe ka juridiksion ekskluziv për të gjykuar, në Dhomat e Shkallës së Parë dhe Dhomat e Shkallës së Dytë: 1.1. kontestet ndërmjet shoqërive tregtare vendore dhe të huaja, si dhe kontestet ndërmjet personave juridikë publikë dhe privat, në lidhje me çështjet e ndërsjella tregtare dhe çështje tjera mes tyre, dhe 1.2. të gjitha mjetet juridike, siç përcaktohet me ligjin e aplikueshëm për procedurën përmbare, për çështje brenda kompetencës të kësaj gjykate”*.

Gjykata Supreme vlerëson se në këtë rast me kompetencë lëndore për të vendosur në këtë çështje juridike-përmbare është Gjykata Themelore në Prishtinë, Departamenti i Përgjithshëm, për faktin se debitorët në këtë çështje përmbare kur është lejuar përmbarimi dhe lënda ka qenë në Gjykatën Themelore në Prishtinë, edhe pse kanë paraqitë prapësim, e njëjta gjykatë, me aktvendimin E.nr.1093/2012 të datës 12.09.2014 ka refuzuar të pabazuar prapësimin e debitorit, të paraqitur ndaj aktvendimit mbi lejimin e përmbarimit E.nr.1093/2012 të datës 23.04.2013. Ndaj aktvendimit të lartcekur debitori ka paraqitë ankesë, ndërsa Gjykata e Apelit me aktvendimin Ac.nr.4323/14 të datës 26.01.2015 ka refuzuar si të pabazuar ankesën e përfaqësuesit të debitorit, ndërsa ka vërtetuar aktvendimin e Gjykatës Themelore në Prishtinë E.nr.1093/12 të datës 12.09.2014. Po ashtu Gjykata Themelore në Prishtinë, Departamenti i Përgjithshëm, Divizioni Civil me konkluzionin e datës 19.05.2020 ka urdhëruar kreditorin që në afat prej 3 ditësh ta njoftoj gjykatën me shkrim se a ekziston interesi juridik në këtë çështje përmbare. Pasi që në rastin konkret kreditori nuk ka kërkuar që lënda të kalojë te përmbaruesi privat ashtu siç është përcaktuar

me nenin 397 të LPP-së, andaj Gjykata Themelore në Prishtinë, Departamenti i Përgjithshëm, mbi bazën e këtyre rrethanave nuk ka mundur të shpallet jo kompetente në pikëpamje lëndore por është dashur të vazhdoj në trajtimin e rastit.

Pasi që për mjetet juridike të paraqitura është vendosur nga gjykatat e instancave më të ulëta, andaj sipas vlerësimit edhe të Gjykatës Supreme kjo çështje përmbartimore, nuk është në kompetencë të Gjykatës Komerciale.

Gjykata Supreme e Kosovës, pas shqyrtimit të shkesave të lëndës e bazuar në dispozitat e lartcekura, gjeti se gjykatë me kompetencë lëndore për të vendosur sipas propozimit për përmbartim është Gjykata Themelore në Prishtinë, Departamenti i Përgjithshëm.

Nga sa u tha më lart, e në kuptim të dispozitës së nenit 25.2 të LPK, u vendos si në dispozitiv të këtij aktvendimi.

GJYKATA SUPREME E KOSOVËS – PRISHTINË

CN.nr.100/2024, datë 11.03.2024

Kryetari i kolegjit - gjyqtari
Zenel Leku